

**Date – 25/05/2025**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (EVENING)**

1. NITI Aayog Governing Council inkhawmah chief minister Pu Lalduhoma chuan Thenzawl ah khawpui din a duh thu a sawi.
2. Khawvel leh ramchhung hmun thenkhata Covid-19 hri a len thar leh avangin Mizoram health department hotute chu a tul ang hmachhawn turin an inbuatsaih.
3. Kumin March ni 20 atanga African Swine Fever (ASF) vawk pulhri Mizoramah a leng tih finfiah a nih hnu-ah Siaha leh Lawngtlai district-a thingtlang khua-ah a taidarh mek.
4. Prime Minister Narendra Modi-a'n Operation Sindoor chu khawvel hmun hrang hranga a firfiaka chetna do kawnga inrintawkna leh thahnemngaihna thar siamtu a ni, a ti.

<><><>

**CM-NITI AAYOG**

NITI Aayog Governing Council inkhawm vawi 10-na-ah chief minister Pu Lalduhoma chuan Thenzawl a khawpui din a duh thu a sawi.

Prime Minister Pu Narendra Modi kaihhruai a Delhi-a nimina NITI Aayog thuneitute thutkhawmnaah he thu hi sawiin Pu Lalduhoma chuan Mizoram mipui zatve ai a tam khawpuiah an cheng ni a sawiin khawpui a cheng zaa sawmriat chu Aizawlah an cheng mek a ni a ti a. Hemi avang hian Aizawl khawpui a tawt em em mai a. Mizoram thalaite hi huan lo ram neih leh thil siamchhuahna lama tam zawka an luhna tur dap a ngai a. He mi kawnga Mizoram mutan kheng thla turin khawpui thar, mipui nuai sawm atanga nuai sawmpanga vel khawsakna tur Thenzawl-Peace City din a duh thu a sawi a. He mi tipuitling tura Ministry of Housing & Urban Affairs an thlawp that avangin lawmthu a sawi a ni.

Chief minister chuan tun hnai lawkah Mizoram chu a mi chengte ziaak leh chhiar thiam vek tawha puan a nih thu a sawi a. Hei hian Mizoram chu chhawr tlak mihring (human capital) lama a inbuatsaih nasatzia leh a hlawkpuizia a tilang a ni a ti a. Hna hmu lo chu za zela 2 point 2 chauh ni a sawiin, hnathawk zingah hmeichhiate chu za zela 45 lai an nih thu a sawi a. Thiam thil lamah pawh Mizoram

chu a duai lo hle a, khawvel huap inelnaah India aiawh thei khawpa tha an awm niin a sawi.

Kum 2047 a khawvel ram hmasawn berte zinga tel tura inbuatsaihna Viksit Bharat 2047 a hlawhtlin theihna atan NITI Aayog State Support Missions kaltlangin Mizoram chuan chak takin hma a la niin Pu Lalduhoma chuan a sawi a. Department tin ruahmanna (action plan) thehluhtir an ni a, an ruahmanna siam theuh behchhan hian Mizoram hmathlir (Vision Document) buatsaih mek a nih thu leh rei loteah NITI Aayog a thehluh a nih tur thu a sawi.

Viksit Bharat 2047 atana Mizoram sorkar hmalakna langsar tak chu Bana Kaih ruahmanna a ni, a ti a. Ram hmasawna atana thawhpuitlak (progress partner) te chu cheng nuai 50 thleng puktir theih an ni dawn a, an thawh that dan a zirin a pung awm lova pek an nih tur thu a sawi a. Tunah hian chutiang thawhpui chu a thawh khat nan mi 517 thlan fel an nih tawh thu a sawi a. Sorkar laipui ruahmannate nena kaldun zel tura duan a ni, a ti.



**BORDER TRADE**

Lawngtlai kaltlanga Myanmar rama Chin state leh Rakhine state a bungraw phurhluh khap chu kar kal ta Thawhlelni zan atang khan zawm chhunzawm a ni lo.

Lai autonomous district council (LADC)-a senior revenue & settlement officer Pu A. Zaithanga chuan a hma a Lawngtlai district bawrhsap Pu Cheemala Siva Gopal Reddy hova district civil defence force thutlukna lo siam tawh angin India leh Pakistan ram inepna boruak avangin Lawngtlai district a chengte'n nitin eichawp thil an tlakchham lohna turin May ni 16 khan Myanmar lama mipui nitin mamawh ang chi thawnluh khapna thupek a chhuah a. Myanmar lama bungraw thawh phalna 'trade licence' neite chu bungrua an thawh lui a nih chuan an licence tihtawpsak thleng a hrem theih an nih tur thu hriattirna chhuahah hian tarlan a ni. Mahse, ramri tawn tawna chengte inhriatthiamna hmangin kar kalta Thawhlelni zan atang khan insumdawn tawna hi chhunzawm leh a nih thu ramri a awmte chuan an sawi a. Bungraw chi hrang hrang hi Chin state chhimlam Paletwa khua kaltlangin Rakhine state lama phurh luh zui leh mek a nih thu thudawna chuan a sawi a ni.

Mizoram chhim lama ramri-a insumdawn tawna-ah hian tuialhthei, hriak (tel), chhang, hmarcha, rangva, battery, solar panel, furniture te leh eichawp chi hrang hrangte Myanmar lamah an chaw lut a. Lawngtlai a kan Corr sawi danin Lawngtlai district-ah hian Hruitezawl kaltlangin Myanmar lamah bungraw thawh a ni ber a, Siaha district-ah chuan Lungpuk khaw kaltlanga phurhluh a ni deuh ber thung a ni.



COVID-19

Khawvel ram thenkhatah leh ram chhung hmun thenkhata Covid-19 hri a len thar leh avangin health department hnuaia integrated disease surveillance programme (IDSP) hotute chuan a tul anga hmachhawn turin ngaihtuahna an seng mek.

Mizorama IDSP nodal officer Dr. Vanlalrengpuia Chinzah hnen atanga thudawn danin tunah hian ramdang leh ramchhunga Covid-19 hri leng thar leh hi ngun taka zir chian reng a nih bakah sorkar laipui atang pawhin chanchin dawn reng a ni a. Chuti chung chuan engtin nge kalpui dan tur tih erawh chu thurawn an la dawng lova. Chuti chung chuan a mamawh dan azirin hrileng a lo thlen ve thulha chetlak dan turah ngaihtuahna an seng reng niin a sawi. Dr. Vanlalrengpuia Chinzah chuan thil awmdan a zirin Covid-19 hrilenna ram leh state atanga Mizorama lo lut turte thlawhna tumhmun emaw hmun hrang hranga lo endik a lo thliar thleng pawhin ruahmanna siam thei turin an inralring niin a sawi.

Kum 2020 atanga 2023 bul lam thlenga Mizorama Covid-19 hri leng avang khan mi 734 an thi a. Kum 2021 a Delta variant a lo chhuah kha thi an tam ber a, mi 538 zet kum khat chhungin an thi a. Kum 2022 khan mi 180 an thi a, hri a len tan kum 2020 leh a reh kum 2023 kumte khan mi 8 ve ve an thi a ni. Covid-19 vei leh vei lo hre turin sample nuai 20 dawn lak a ni a, chumi zingah chuan nuai 2, sing 3 leh sang 9 chuang chuan he hri hi an kai tih hmuhchhuah a ni a. Hri kai dam leh hi mi 2,38,901 an ni a, chu chu za zela 99 point 68 a nih lai-in thi zat hi za zela bial point pathum a ni thung a ni.



MALARIA, DENGUE

Kum 5 kal ta chhung khan sikserh (malaria) natna vei mi 59,119 hmuhchhuah zingah mi 46 Mizoramah an thi a, nikum chhunga thi zat chu 7 an ni.

Health & family welfare department hnuaia a National Vector Borne Disease Control Programme (NVBDCP) hotute hnen atanga Akashvani Aizawl-in thu a dawn danin nikum chhung khan sikserh natna an vei leh vei loh thisen endik sak mi nuai 3, sang 7 leh 468 an awm a, chu'ng zinga mi 16,899 chuan sikserh natna an hri an kai a, an zinga 7-in nunna an chan. Sikserh natna kai zinga 8,950-te hi Pf an ni a, 7,949-te erawh chu Pv an ni. Nikum chhung bik hian Lawngtlai district-ah sikserh vei an tam ber a, mi 8,067 awmin an zinga mi 5-in an thihpui a. A mi cheng 1,000 zela chhuta vei zat hi 56 point 70 niin Mizoramah an sang ber a, thisen endik atanga sikserh hri kai hmuh chhuah za zela kai zat pawh 16 point 60 zet a ni. Nikum chhung vek hian Lunglei district-ah sikserh natna vei mi 3,775 hmuh chhuah a ni a, thihpui an awm lova, Mamit district-ah mi 3,299-in an vei a, mi 1-in a thihpui thung. Kum 5 chhung, kum 2020 leh 2024 inkar chhung khan kum 2023-ah malaria thihpui an tam ber a, mi 13 an thi a, kum 2021 leh 2022 khan mi 10 ve ve an thi a. Kum 2020 khan mi 6 thi-in nikum khan 7 an thi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ASF

Kumin March ni 20 atanga African Swine Fever (ASF) vawk pulhri Mizoramah a leng tih finfiah a nih hnu-ah Siaha leh Lawngtlai district-a thingtlang khua-ah a taidarh mek.

Animal husbandry & veterinary department hotute'n an sawi danin district 4-ah ASF vawk pulhri hi a leng mek a. Mamit district a Zawlnuam khua a veng 3-a leng chu ni engemawzat thunun a nih tawh bakah khaw danga a darh thawm hriat a ni lova. Lunglei district-ah pawh tun thlengin vawk thi leh suat la awm mah se khawpui chhung bakah a la darh rih lo ni a hriat a ni. Hetih lai hian Siaha leh Lawngtlai khawpui chhung veng hrang hrangah chauh vawk pulhri hi a darh emaw tih lai-in a bul hnai thingtlang khua-ah tun hnai atang khan a darh tawh tih Vety hotute chuan an sawi a. Siaha-ah hian khua leh veng 35-ah a darh tawh lai-in Siaha khawchhung ni lo, a bul hnai khaw 10-ah a tai darh mek tawh a. Siaha khaw chhung veng 25-in an tuar nasa hle. Lawngtlai district-ah pawh Lawngtlai khawpui chhunga veng 12 bakah a chhehvel khaw 5-ah a darh mek tawh a ni.

<><><>

MANN KI BAAT

Prime Minister Narendra Modi-a'n Operation Sindoor chu khawvel hmun hrang hranga a firfiaka chetna do-na kawnga inrintawkna leh thahnemngaihna thar siamtu a ni, a ti. Vawiin Akashvani-a Mann Ki Baat hun a hmanna-ah he thu hi sawiin huaisen taka Operation Sindoor thlaktu sipaite chu an fakawm tak zet a ni, a ti a, sipaiten an tum thelh miah lova ramri lehlama mifirfiakte tawm rukna an chhu chhe thei chu a ropui tak zet tih sawiin a firfiaka chetna dolet kawngah ram mipuite an inlungual vek a ni, a ti.

<><><>

MANN KI BAAT

Mizoramah pawh Fisheries, Animal Husbandry and Dairying and Minority Affairs changtu Union Minister of State Pu George Kurian hovin State BJP Office Atal Bhawan Aizawl-ah Prime Minister Narendra Modi-a'n thlatin ram mipuite hnena thuchah a sawi thin, 'Mann ki Baat' tum 122-na an ngaithla a. Prime Minister Narendra Modi kaihruai sorkar chuan ram tan theihtawp a chhuah reng a, Mizorama hmasawna hna hrang hrang thawh mekte pawh tha taka thawh a nih a, hlawhtlin hmuh ngei a beisei thu leh Mizoram mipuite chu nakin zela thangthar lo la awm zel turte tan ram hmasawna tluantling a neih theih nan tanrual a ngaihthu union minister hian a sawi a.

Mann ki Bhaat chu vawiin khan Chawngte-ah a huhovin ngaithlak a ni bawk a, BJP Chakma Autonomous District Council huaihawtin Prime Minister thusawi hi Kamalanagar-IV a Bazaar Shed ah mipui ten a huhovin an ngaithla a, Chawngte khawchhung bakah a chhehvel khua atangte pawn Prime Minister thusawi ngaithla tur hian an kalkhawm a, Chawngte ah hian Maan Ki Bhat hi a hma pawhin huhovin an lo ngaithla tawh thin.

Pu Durjya Dhan Chakma President BJP, CADC chuan Prime Minister thusawi ngaithla tura pungkhawmte hnenah lawmthu sawiin, BJP Sorkar chuan hmasawnna nasa tak a thlen mek a ti a, hnam hnufual zawk tan paw’n Prime Minister hmalakna chu inngahna tlak a ni tih sawiin, India ram hmathlir hlawhtlinna thlen tur chuan Prime Minister Narendra Modi leh a kaihhruai BJP Sorkar chu an tling tawk a ni a ti.

<><><>